

小倉山房詩集

序

爾雅疏云序者序述此經之旨也隨園先生論

一見于集中答歸愚宗伯書再見于續詩品三十二首
凡古人所未道者業已自道之無俟再爲序述第按其
所編始弱冠終花甲四十年之行藏交際具在於斯可
當康成年表讀矣晚年境愈高才愈斂欲刪去少年落
花殘雪諸作起鳳爭曰孤松蒼於冬時花繁於春各有
其時不可廢也先生曰諾已乃並存之橫山弟子薛起
鳳序

讀隨園詩題辭

我讀隨園詩古多作者我不知古今只此筆數枝怪哉

公以一手持意所欲到筆注之筆所未到意益發其
搖曳春雲接雷雨捲空分疾遲神仙龍虎稜怒嬉幽禽
古木山四圍水光滄滄花垂垂境界起滅微乎微難達
之情息息吹難狀之景歷歷追我忽歡喜忽傷悲忽叫
忽躍忽嗟咨口權目量心是非我身傀儡詩牽絲問我
不知旁人疑如沐酥酪潤膚肌如飲醇醪沁肝脾如禮
杖拂迴愚癡如受砭刺起瘳痼海嶽幽奧林泉奇氣象
入筆皆可窺高才博學嚴鉅規心兵意匠極艱危歸諸
自然出淋漓公曰我詩無常師取長棄短各有宜傾瀉
情液擲毛皮取友求益善無私先生天才重倫彝至情
感人皆涕洟每值死生當別離山片言至千萬詞不少

不多相授施魂銷腸斷噫歎聖賢萬古情若斯否則
其言傳者希我詩感公加鍼雖凡我所短攻弗遺剛濟
以柔戒恣睢裁縮鍛鍊歸鑑鍾請事斯語曷敢違公懼
弗傳誰庶幾索報悵悵命黜曠壯健無疾求良醫調和
血氣慎獲耆敢妄攻補促尪羸卅載所作手芟夷美人
對鏡修容儀釵裙佩帶生光輝玉工懷璧精磨治白圭
瑩潔除瑕疵淺深功力年可推江河發源無所虧及放
四海寧竭衰况公遺榮樂嚴扉忠孝所溢詩書滋後進
我幸生同時願寫副本藏屢屢千秋歲月堂堂馳讀公
詩者如何思館後學蔣士銓題

讀隨園詩題辭

其人與筆兩風流紅粉青山伴白頭作宦不曾逾十載
及身早自定千秋羣兒漫撼虬蟬樹此老能翻鸚鵡洲
相對不禁慚飯顚杜陵詩句只牢愁

舒卷閒雲在絳霄平生出處亦超超曾遊閬苑輕三島
愛住金陵爲六朝富貴豈如閒有味聰明也要福能消
不須伯道愁無子此集人間已不祧

只擬才華艷誰知鍛鍊深殺人無寸鐵惜墨抵兼金右
鬼忽然泣生龍不可擒挑燈重相對想見妙明心

館後學趙翼題

讀隨園詩題辭

憶自數歲入鄉校卽聞世有才子姓袁字子才漢廷峙
楊馬梁園艷鄒枚斯人一出文選廢蕭統若在須別裁
比長游都下結交海內英益得才翁之才與其行三十
作文賦徵在鴻儒班一舉擢高第供奉 玉皇前每出
一篇奏已被中外萬口傳若非河滿張承吉卽是洞蕭
王子淵鸚羽苦羈絆三載辭 金殿驥足稍欲施四任
率江縣江左形勝天下偉古來名士此中半臨江酌酒
弔桓王開國英雄同弱冠三十未及強拂衣賦歸歎金
陵有遺愛遂就金陵居犀首不好飲虞卿還著書燕許
兩禿翁鞠臆斂手謝不如更以其暇刷奇石選妙妓闢
華軒跌宕詞賦闌咽管絃遂使當代鉅公貴人下逮傭

豎併婦孺無不知大江以南有隨園橋也陋已極未及
身作隨園客一官投嶺嶠所見生獐語啁啾或傳才翁
名謂是古人今莫得忽驚將軍自天下如郭令公出回
紇中丞爲予言子才詩中霸子往試與語庶免爲驅嚇
碧虛洞與棲霞連一見握手如舊歡自言行年七十走
萬里相得無如吾子賢朝遊共蹠白雲屨夕歸同泛明
月船岸人笑謔爭指似采石江上看謫仙我詩槎枒多
苦語誰其好之茹不吐才翁一呼四座驚此至誠通愈
及甫比疎詎所當交驚亦差樂平明來取別將往觀
衡嶽中路寄我詩已據衡嶽之磅礴噫嘻戲才翁之才
如天風人籟雖工那得同惟有隨園歉未到要使姓名

先署隨園中

隨園詩贊

曠矣先生侔今無徒儕古少類達如劉伯倫而不好飲
逸如稽叔夜而不好音樂習靜如王摩詰而不好佛恬
退如賀季真而不好道以名教是非自任如韓退之而
不好儒志鄙王戎而不諱好財性異阮咸而不辭好色
詼奇似橫疑龍疑蛇播之爲文天縱地葩或謂是太白
之精所化而爲文章之宗耶或謂是歲星所寓而爲滑
稽之雄耶吾莫能測之而盡其形容也

後學李憲喬題

小倉山房詩集總目

第一卷

古今體詩五十二首

第二卷

古今體詩五十四首

第三卷

古今體詩九十八首

第四卷

古今體詩八十四首

第五卷

古今體詩一百二首

第六卷

古今體詩七十二首

第七卷

古今體詩九十首

第八卷

古今體詩一百四十九首

第九卷

古今體詩七十二首

第十卷

古今體詩一百二十五首

第十一卷

古今體詩九十四首

第十二卷

古今體詩三十一首

第十三卷

古今體詩一百二首

第十四卷

古今體詩七十二首

第十五卷

古今體詩一百五十二首

第十六卷

古今體詩一百二首

第十七卷

古今體詩一百三十三首

第十八卷

古今體詩五十六首

第十九卷

古今體詩九十二首

第二十卷

古今體詩一百三十五首

第二十一卷

古今體詩七十首

第二十二卷

古今體詩六十一首

第二十三卷

古今體詩七十九首

第二十四卷

古今體詩一百二十首

第二十五卷

古今體詩一百九十首

第二十六卷

古今體詩二百七首

第二十七卷

古今體詩一百十八首

第二十八卷

古今體詩二百十九首

第二十九卷

古今體詩一百一首

第三十卷

古今體詩二百三十四首

第三十一卷

古今體詩一百三十七首

第三十二卷

古今體詩一百八十七首

小倉山房詩集卷一 丙辰丁巳

錢唐袁枚子才

錢唐江懷古

江上錢王舊蹟多我來重唱百年歌
勸王妙選三千弩不射江潮射汴河

釣臺

夜泊釣臺旁客星如月大想見嚴子陵
投竿在此坐朝隨漁翁嬉暮陪至尊卧爲念故人重轉覺天子輕偶展榻上足乃驚天上星

書子陵祠堂

士各有志在投贈須良時乃欲臣老子張眼發狂癡巢

由効孤忠唐堯何能知當時西漢衰士氣一何卑四十
二萬人尊莽稱巍巍先生隱蘆中惻然心腸悲故人作
天子臣請爲伯夷甘與子同夢伸脚踏紫微贈子以不
拜王丹吐微詞將軍有揖客衛青賢可思何況赤伏符
可無王者師雲臺麟鳳旁漁者張一旗果然東漢風名
節爭扶持相助爲理處於後乃見之我留壁間墨當贈
先生詩

羅昭諫墓

遠望壘江氣寂寥江東遺塚草蕭蕭三生金榜無名字
一卷唐詩殿本朝照壁紅紗曾志寵隔簾嬌女罷吹簫
傷心杜進英雄計花醉華堂淚未消

臨安懷古

曾把江潮當敵攻三千強弩水聲中
霸才越國追勾踐
家法河西散賈融
宰樹重重封錦繡
宮花緩緩送春風
誰知苦利東周局
留與平王避犬戎

吳桓王廟

擲戟神亭一笑分英雄
名號尚郎君
南來劍奪中原色
獵罷龍驚草上雲
自覺風流夸二壻
有誰旗鼓鬥三軍
千年願獻鐃歌曲
帳下還愁子布聞

琵琶亭

孤亭月落九江秋
彈過琵琶水尚愁
今日蘆花笑詞客
不曾老大已飄流

謝太傅祠

一笑翩然載酒行
東山女妓亦蒼生
能支江左偏安局
難遣中年以後情
花下殘棋兒破敵
燈前老淚客彈箏
荒祠隔葉黃鸝語
猶似當初絲竹聲

夜渡彭蠡風浪大作

半夜顛風欺客過
奪取孤舟當箕箒
桅折羣驚犬蠹崩
燈昏不辨何船破
騎虎由來勢莫停
駕鰲且向西南征
滿眼黃泉不見路
呖喻但聞龍虬聲
青蘆颯颯寧而止
長老大呼吾生矣
拍拍羣鷗扶浪起
彼此相看面如紙
衣裳都付宓妃洗
一身之外水而已
編詩不編前甲子
墮地重生從此始

野行

野行逐流水花裏得茅廬中有龐眉叟旁堆數卷書衣冠非漢魏妻子半樵漁拱手詢名姓無言指太虛

看山

看山有所得日暮聊爲詩舟子多曳足村歌以答之江湖發天籟秋光亦平分我歌船頭月爾歌船尾雲

浯溪碑

夷吾雖歸辱社稷射姑來朝無貶詞從曰撫軍守監國古來冢嗣良如斯宋儒不明春秋義題浯溪碑多刺譏當時明皇躍馬去五更昏黑西川駝若非靈武張位號九州不見天皇旗望賢宮前重返蹕黃袍手著如嬰兒

一辭一畀見真性此際慈孝天皆知玉真公主具尊酒
上皇父老相娛嬉監奴攬權艷妻惑從此兩宮生猜疑
君子原情論大義事有後累無前非魯公忠孝立人極
金石腕力尤淋漓先拜新君心扑舞後望南內空淒其
書罷大唐中興一頌刻山石再書請朝上皇一表鋪丹
墀

長沙謁賈誼祠

江口瞻遺廟長沙最少年才雖王者佐運是漢家天屈
子堪同調相如敢比肩虛無室問卑濕楚江遷道大
功臣忌心孤鵬鳥憐三湘知數盡七國悟機先飄泊傷
靈化穠華委逝川綠蘿蟠敗壁飢鼠拱殘筵神鬼真無

狀風雲合有緣長懷夫子哲轉憶孝文賢遇合終如此
功名更惘然我來剛弱冠流涕返吳舩

巴陵道中

洞庭西去女郎祠來憇行人有畫眉山縣城荒闕店早
戍樓燈遠泊船遲方言莫辨思重譯吳鳥無名愧學詩
難得篙工解人意每開牕處對花枝

旅懷

欲采芙蓉贈楚狂幾番漁笛聽滄浪洞庭霜淺橘全綠
湘浦雨深荷暗香行色喜逢秋八月家書孤負雁千行
無端側耳隣船泊有个人音似故鄉

書倉頡廟

黃帝上天不識字玉皇大笑人間俗特遣倉公來造作
電光熒熒開四目遠采龍魚篆近取蝌蚪行一畫生枝
葉六書加偏旁可以記名姓通九州三才萬象相咨諏
天公賜粟萬萬石厥功猶未酬千鬼何事哭啾啾上古
無黎邱疑是三王五帝之靈爽相悲愁倉公不知故賤
子請致詞行公之道享公福古今惟有尼山師與公初
意無相違其餘竄經冒聖紛紛者坑之不足蔽其辜而
乃辟睨兩廡犧牲乎摩騰借此來中華侏僂梵偈盈百
車學仙誤仙書白骨如撐床此外深文刀筆萬萬條張
湯趙禹日喧譁官禮亡新室血流誣武王元凶講孝經
妖僧造明堂董俠強解事皇義五十章穿鎚大將軍盪

脫校書郎蠹魚食盡三萬字上天不如蜻蜓翔腐儒識
之無公然搔首怨彼蒼我自與公有瓜葛亦復咿唔如
蚊蠅不能腰鎌田中騎馬沙塲三升墨水非瓊漿他日
餓死分所當故鬼哭未已新鬼淚沾裳功過不相掩請
公自思量公如肯補過請公南面坐周公右孔公左始
皇在旁手把火刪除六經質諸聖黜陟百家來問我朝
不必多書野不必多儒拔兔一毛利天下欽明文思追
唐虞再拜莫椒酒臣言是與否倉公領之不開口但見
神鴉鬼馬雲中各點首

萍鄉紀事

遠望碧桃盛不知何家村停舟蹇裳往頗聞書聲喧柴

門數學子列坐何彬彬聞有江南客欣然喜動顏各將
文章來願聞所未聞爲之小講解圍坐點頭頻歸各具
雞黍手自擎瓦尊父兄荷鋤歸亦來覘佳賓但勸客小
住不知天黃昏我乃行役者風中不定身告以勢難留
紛然淚滿巾攀衣送登船姓名僉云云後會知難期前
途君自珍感茲醇朴意如逢義軒民方知古桃源依然
在人間但恨無緣留回頭空白雲

同金十一沛恩遊棲霞寺望桂林諸山

奇山不入中原界走入窮邊才逞怪桂林天小青山大
山山都立青天外我來六月遊棲霞天風拂面吹霜花
一輪白日忽不見高空都被芙蓉遮山腰有洞五里許

乘火直入衝烏鵲怪石成形千百種見人欲動爭谿衍
萬古不知風雨色一羣仙鳳依爲家出穴登高望衆山
茫茫雲海墜眼前疑是盤古死後不肯化頭目手足骨
節相鈎連又疑女媧氏一日七十有二變青紅隱現隨
雲烟蚩尤噴妖霧尸羅袒右肩猛士植竿髮鬼母戲青
蓮我知混沌以前乾坤毀水沙激盪風輪頓山川人物
鎔在一爐內精靈騰蹕有萬千彼此游戲相愛憐忽然
剛風一吹化爲石清氣旣散濁氣堅至今欲活不得欲
去不能只得奇形詭狀蹲人間不然造化縱有千手眼
亦難一一施雕鐫而况唐突真宰豈無罪何以耿耿羣
飛欲刺天金臺公子酌我酒聽我狂言呼否否更指奇

峯印証之出入白雲亂招手幾陣南風吹落日騎馬同
歸醉兀兀我本天涯萬里人愁心忽挂西斜月

薦鴻詞北上辭別桂林中丞

萬里投知己千秋見偉人掃門才授贊倒屣已迎賓弱
冠終軍小憐才鮑叔真牛心先賜啖馬骨倍精神一卷
文章獻千回諷誦頻百僚叅謁處八座散衙辰譽我如
夸寶稱詩似數珍人聲齊諾諾公口尚津津詔舉通
經士慚非珥筆臣毅然標姓氏直白奏楓宸計吏爭
供具材官盡捧輪辨裝錢絡繹祖餞酒溫醇石重齎難
戴風高草易春未開花獨賞久屈薦應伸多感雲霞興
能增骨肉親窮途來阮籍有叔愛蘇秦叔健臂以公桂
故加刮目焉

嶺三秋月長安一路塵拜辭先洒淚圖報屢看身夫子
宮牆遠男兒事業新遙聞西域國獨角貢麒麟

別常寧叔家青衣

六千里外一奴星送我依依遠出城知已那須分貴賤
窮途容易感心情離江此後何年到別淚臨岐爲汝傾
但聽郎君消息好早持僮約赴神京

黃鶴樓

萬里青天月三更黃鶴樓湘簾才手捲漢水拍天流山
影如爭渡漁歌半入秋深宵無鐵笛空自泊孤舟

過洞庭

秋老一峯晴已船過洞庭水搖天地白山入混茫青雲

氣飛蓬背霜花落雁翎今朝吟不得牕外有龍聽

題柳毅祠

風鬟雨帶藕絲裙素手傳箋寄暮雲世上女兒多誤嫁
諸龍休惱洞庭君

漢江遇風

風急蒲帆葉葉張蘆花飛雪打瀟湘似盛漢水湖猶小
欲上君山浪太狂行役自來多涉險少年何事便離鄉
黃昏漸喜驚濤定遠遠漁歌唱夕陽

途中見薦章感而有作

一紙封章薦禰衡秋風八月動行旌三朝曠典儒林重
二十華年海內驚粵嶺懷人丹桂影瀟湘聽雨竹枝聲

疏中溢美吾尤愧道有奇才應運生

赤壁

一面東風百萬軍當年此處定三分漢家火德終燒賊
池上蛟龍竟得雲江水自流秋渺渺漁燈猶照荻紛紛
我來不共吹簫客鳥鵲寒聲靜夜聞

峴山

浮生幾載青山酒名士常爲萬古愁雙淚偶揮羊太傅
一碑如補晉春秋樓傳黃鶴仙何在珮解明珠水自流
今日敬兒天下滿襄陽片石若爲留

銅雀臺

停車欲訪魏遺宮銅雀荒涼片瓦空生對河山常感慨

死猶歌舞是英雄君王氣盡高臺酒兒女春殘甲帳風
七十五來神恍惚西陵可與茂陵同
殿上歸來履幾雙三分天下更分香一家樂府商聲老
八尺燈帷鄴水涼疑冢尚存兵法意招魂只用美人粧
傳心曾許諸姬嫁老去將軍話竟忘

題張睢陽廟壁

刀上蛾眉喚奈何將軍隣境尚笙歌殘兵獨障全淮水
壯士同揮落日戈六射鬚眉渾不動一城人肉已無多
而今雀鼠空啼竄暮雨靈旗冷薜蘿

大梁弔信陵君

魏王沉醉美人起羅袖無辭符取矣父仇已報國仇未

妾請將符授公子翩翩公子玉手擎深宮箭漏傳三更
侯生迎來指而笑彼執權者須同行晉鄙嘆惜未張口
撲殺此猴如屠狗壁上高懸救趙旗精兵八萬邯鄲走
坐中忽失白頭人淋漓血作送行酒更有布衣魯仲連
竭來大笑平原君一聲帝秦便蹈海海水欲立奔秦軍
秦軍退避五十里咸陽虎狼心欲死美人壯士兼清流
一齊來與秦爲仇秦宮縱有鈞天樂不如且歌秦女休
魏王醉眼終朦朧至死不愛將軍功醇酒婦人卽東海
甘心一蹈真英雄吁嗟乎君不見高皇赤龍只解罵騎
馬墳前悚然下又不見張耳滅秦封王聲赫赫原是郎
君門下客

牛口谷

一旅中原振鼓輦夏王仁義偃王齊空爭孤注黃河北
不解連環太華西牛口谷深天意在虎牢關失陣雲低
英雄回首書生計夜夜青山杜宇啼

博浪城

真人采藥走蓬萊博浪沙連望海臺九鼎尚沉三戶起
六王纔畢一椎來黃金宮闕神仙遠白璧光陰山鬼催
此日西風如力士當車還擊布幃開

涇淵

路出涇河水最清當年照影見親征滿朝白面三遷議
一角黃旗萬歲聲金幣無多民已困燕雲不取禍終生

行人立馬秋風裏
懊惱君王早罷兵

過鄴下弔高神武

唱罷陰山勅勒歌
英雄涕淚老來多
生持魏武朝天笏
死授條侯殺賊戈
六鎮華夷傳露布
九龍風雨聚漳河
祇今尚有清流月
曾照高王萬馬過

白馬驛

清風不斷霧不生
清流不斷國不傾
千年古驛黃河邊
鬼過猶作鳴珂聲
當時嘲賊朝門爲
三千詩人骨一把
已聞裴甫憫青蠅
更見朱三來白馬
迂哉裴十四觥觥
矜門第三百年唐
交與誰猶說太常卿
不置崔裴物望
冠中朝廿爲官家
受一刀半夜鴟梟啄
孤鳳翬星三丈

風蕭蕭君不見太原樓下美人啼一片凝脂刀上飛時
來阿父監軍龍運去傾城名士悲又不見陸笏司空圖
請兵羅昭諫從古詩人報國心不曾一識君王面

銅駝街

洛陽銅駝昂首坐愁容似見晉宮破晉宮天子美少年
敦詩說禮人稱賢一付殘碁難着手宮寢紛紛胡騎走
柘弓銀硯舊交情猶着青衣喚行酒椒房綺苑劉貴嬪
往來兩受君王恩輒道早知誅諸子劍門悔不作公孫
人將隱慙尤司馬我道善淫報者寡吳蜀降王富貴終
此例分明天不假君不見商臣盜昭終天年冒頓當時
且配天

北魏帝移宮處

佛狸子孫土運終魚羊食人來九龍抱獅帝子顏如玉
垂衣班朔明光宮臣湜獻酒陛下聖忽然三拳狗脚朕
此人又似不相容請別六宮無所恨握璽親辭白玉床
美人泣下空斷腸三千花枝帶紅雨一齊灑向黃衣裳
中有窈窕李賢妃掩泣請歌曹王詩願王加餐保玉體
願王永享黃髮期明知此別難相見長歌且作須臾戀
新朝司馬在旁催不送君王出寢殿碧海青天白日斜
生生世世帝王家剛送故君低忍淚便迎新主強簪花
吁嗟乎如虎如龍未十年又見灣頭乞小憐

景泰陵

雨帝當年一曲關西山藁葬艸漫漫目夷守國才何大
叔武迎君事本難金鎖門高星象動玉連環小淚珠乾
阿兄南內如嫌冷五國城中雪更寒

易水懷古

燕丹買匕首欲摧秦王腰仁義非不佳急則治其標一
時田光輩輕死如鴻毛荆卿慷慨行祖餞風蕭蕭長虹
貫白日虎狼氣不驕可惜咸陽宮殺人先露刀股血空
淋漓祖龍竟脫逃魂歸易水旁化作陰風號至今白衣
冠慘慘時一遭時來藥囊重運去阿房焦歎息諸英雄
不如一趙高

同一百九十三人試博學鴻詞于保和殿下時班

中無弱冠者諸王公都來疑年口號以對

襴衫青入九重天岳牧科慚員半千末坐竟陪燒尾宴

遲來猶領大官錢

時鴻博未試者恩給月俸書完黃紙三千牘身

到紅塵二十年家是南朝舊臨汝敢將才語向人傳

游仙曲

子晉驂鸞太少年吹笙未改望神仙爲看雞犬飛昇後
轉把芙蓉笑向天

同著青裙拜木公釣天酒散駕飛龍黃金梯滑行難上
重渡銀河水一重

一雙珠履躡飛霞三變元雲日未斜聽說天門傳玉旨
春寒留住早開花

駿馬行

房星下天馬出世萬恠藏形虎豹避爲負河圖獻聖人
呼風遠自流沙至駒齒未落才先老四嶽三塗馳遠道
顧影常空冀北羣圖形只覺金門好孫陽一見驚權奇
貢之天開夸馱馱黃金議買價難定白眼相看馭者誰
躑躅長安猶未去青天月照麒麟步兩耳難禁晝角鳴
一餐苦記施恩處天子文明駕六龍不愁神駿不遭
逢只愁噴玉瑤池返仍化龍形入海中

哭侍御王星望先生

憐才剩有幾人存又送靈旗出郭門八十慈親扶白骨
一羣稚子哭黃昏官窮不信能添病身賤從來易感恩

忍向襄陽見華屋山河回首亦消魂

送張鷟洲御史巡臺灣

戒外荷蘭國開疆自 本朝四圍城是海終日耳聞潮
彈壓須驄馬威稜借皂雕諫書留玉陛飛蓋出虹橋鼓
角龍聽避妖星劍照消甲光秋萬里刀影雪千條古跡
無唐漢奇功有管蕭風和知浪靜弦緩使弓調筆洗扶
桑月花低螺女簫裝寧資陸賈人自愛班超虎節三關
重瓜期兩載遙安邊應努力莫負侍中貂

荊卿里

水邊歌罷酒千行生戴吾頭入虎狼力盡自堪酬太子
魂歸何忍見日光英雄祖餞當年淚過客衣冠此日霜

七首無靈公莫恨亂山終古刺咸陽

黃金臺

東海泱泱大風猛燕王積怨何時逞築臺願招英雄人
黃金之高與天等臺未築時如無人臺既築時人紛紛
不知公等竟安在劇辛樂毅來成羣殘兵一隊山東走
頃刻齊亡如反手回問當年豪舉心果然值得黃金否
於今蔓草繁臺綠千年壯士尋臺哭爲道昭王今便存
不報仇時臺不築

舉京兆

信當喜極翻愁誤物到難求得尚疑一日姓名京兆舉
十年涕淚桂花和泥金掛壁春來早賀客遮門月去遲

想見故園燈火夕老親望眼正穿時

呈座主鄧遜齋先生

忝列長名榜恭逢鄧仲華

師年二十七

寧王私謁少陸氏一

莊夸海闊魚燒尾天高月鑒花龍駒雖泛駕今日出公
家

怕聽

采芹時節我垂髫五鼎龍門尾後焦怕聽旁人夸早貴
已輸十八賈登朝

船上卧月作

無心推篷看不意與月見欣然卧以觀清光懸一片白
蜃如覆被以面漸貼鏡相對久忘言吾亦見吾性

小倉山房詩集卷二 己未至辛酉

錢唐袁枚子才

釋褐

學著宮袍體未安
藍衫轉覺脫時難
呼僮好向空箱疊
留作他年故舊看

臚唱

一聲臚唱九天聞
最是三珠樹出羣
我愧牧之名第五
也隨太史看祥雲
宴罷瓊林有所思
曲江風裏立多時
杏花一色春如海
他日凌霄那幾枝

瓊林曲

三月長安桃李春一條軟繡天街新漢朝覆試端門日
唐代題名雁塔辰官柳慣迎新貴馬杏花偏拂少年人
幾隊霓裳行簇簇瓊林苑裏春波綠未耀頭銜七尺光
已辭墨水三升辱舊僕重談上學時新知各寫同年錄
此時意氣似雷顛此際連鑣渺列仙雕幃翠娥崔象載
牙牌金字李琪鐫明知過眼原如夢爭奈當場欲上天
天家待士有恩光高唱三雍賜六漿湯餅紅綾色奪月
御厨瓊粒影浮霜烏和仙樂碧簫脆露滴玉缸天酒香
不到月宮遊那識嫦娥好不奪錦標歸誰信驪龍巧寄
語燈窗苦志人人生此處來宜早歸時雨髮不簪花簾
幙低遮油壁車糟糠未娶恰曾聘莫悞朝官選婿家

入翰林

弱水蓬山路幾重
今朝身到蕊珠宮
尚無秘省書教讀
已見名箋字不同
班管潤生紅藥雨
錦袍香散玉堂風
國恩豈是文章報
況復文章尚未工

乞假歸娶留別諸同年

還鄉非耀錦衣鮮
爲賦房中樂一篇
慚愧少年貧裏過
玉堂春在洞房先

暫辭鸞鷺舊班行
且逐簫聲引鳳皇
忙殺蘭臺一枝筆
半修昌史半催粧

兒時釣弋武林城
此去書窗月尚明
只恐香閨纓絡動
轉疑鈴索響西清

多感羣仙送暮雲
真珠密字贈紛紛
明年定步花磚早
代聽雞鳴有細君

到家

遠望蓬門樹彩竿
舉家相見問平安
同欣閭苑榮歸早
尚說長安得信難
壁上泥金經雨淡
窗前梅柳帶春寒
嬌痴小妹憐兄貴
教把宮袍著與看

催粧

春明池上綠衣郎
曾被紅裙看欲狂
今日月宮真个到
金蓮圍住合歡床
荆釵微綠布裙紅
白檢青箱有愧容
只好告身親手寫
替卿端正紫泥封

題果亭小照

紅蕉翻虛廊碧苔覆陰地濛濛圓景沉沉淡孤霞繼幽
人倚文石冲襟託遐寄勞侍水精奴左立鸞臺婢各抱
綠綺琴含情如有睇竹涼月影生蓮動水香至爲問秋
正清金絲可彈未

隴上作

憶昔童孫小曾蒙大母憐勝衣先取抱弱冠尚同眠髻
影紅燈下書聲白髮前倚嬌頻索果逃學免施鞭敬奉
先生饌親裝稚子綿掌珠真護惜軒鶴望騰鸞行藥常
扶背看花屢撫肩親隣鸞鵲極姊妹妬恩偏玉陛臚傳
夕秋風榜發天望兒終有日道我見無年渺渺言猶在

悠悠歲幾遷果然宮錦服來拜墓門烟返哺心雖急含
飴夢已捐恩難酬白骨淚可到黃泉宿草翻殘照秋山
泣杜鵑今宵華表月莫向隴頭圓

題蔣元葵進士藏書樓

傳家何者多爲貴數士之富以書對三間高樓如水涼
得書一卷樓皆香我友蔣元葵聚書書如雲連名未請
宰相署四庫已作蘭臺分常言聚書如鬪寶鄉媛所有
安可少牛宏數五尼聞之最懊惱莫使淹中稷下有人
來舉手未翻先了了我言藏書如藏嬌毋使韓女怨曠
空病腰與其橫陳高皮手不觸不如世充沉水秦皇燒
物在天地間有散亦有聚惟有書藏胸臆閒鬼難風災

吹不去我不願騎赤鯉登天門但願化作白蟬遊此處
君聞且笑且點頭手書金笫招客遊不讀崔儵五千卷
莫登宏景三層樓

哭德山公

公姓金諱鉉巡撫廣西入都爲司寇被劾挂冠
歿後授河南布政使枚弱冠受知薦鴻博入都
事載文集神道碑

都門秋色滿靈旗易水風寒石獸危海內正人朝野惜
平生知己古今悲村荒軟碧餘烟柳星折中台看尾箕
銅柱功名銀管筆襄陽還有峴山碑

一紙黃麻照日開千年白骨已蒿萊朝廷不信陽城死

河北空傳寇準來臣力盡時無別恨
君恩深處有餘哀
西山九山峰前水嗚咽墳頭日幾回

萬里呈身一少年公然表薦九重天
方欣賈誼登前席遽作羊曇哭逝川
雪夜宮袍親手賜桂林詩句向人傳
而今回首都成夢問字無由到九泉

送張叔度同年歸觀

長安十月朔風勁我昔假歸君乃更玉堂
官冷不厭寒有意欲與冰雪競憶昔詞科
報罷餘相逢市上各躊躇遲我十年骰子
選與君一旦天門趨笑余聾牙習蚪斗
畧解斐羅偏上口說怪羣驚鬼董狐圍棋
共飽李壽手阿兄五月茂州來酣嬉夜夜
傾醇酒釵挂臣衣宋玉留

帽加瓶上元爭走長安百貨日沸騰每逢廟市月八九
天地燦爛聲噉嘈爾我蹴踏混儕偶手招廉賈喝牢盆
目眩黃鐘嗟瓦缶阜陽女兒名采玉當筵一曲歌楊柳
今日臨邛負弩迎可還杜牧尋春否西江曾記當年來
廬山落日金盤開將軍老樹色黯黯仙人石洞光皚皚
君行寒月歸已晚河偃石瘦梅應胎明年花發臨江渡
畫眉聲裏來時路有妻宛爾香驄馱有母皤然板輿護
宮錦朝縈淡蕩烟玉鞭晚泡淋漓露莫遣吾曹鄙客生
空歌叔度來何暮

許賓穆問學以弔喪被劾南歸

素車縱弔張常侍道廣何傷陳仲弓一日蜉蝣搖大樹

百年長劍挂崆峒江湖歲月君恩重宦海波濤士論
公惆悵送行春正半落花消息雨聲中

贈歌者許雲亭

皮絃金柱小琵琶上巳浮橋阿子家引得周郎屢回顧
長安春在一枝花

霓裳曾已列仙班天上重來解珮環應是玉皇憐絕藝
特留一闕在人間

秋夕偕元敬符訪董浦編修

早秋日落涼風發車行輾輾隨驢脚主人開門一笑迎
官冷身閒衫不著日暮難得屠門肉相逢暫食公孫粥
主人聚書如聚米望來兩眼清如水老樹高涵露氣中

微燈淡照空牀裏回頭回憶兩年前
烝栗堆盤雪滿肩
於今重入延秋宅潯暑風輕蟲在壁
翰林謫論更瀾翻
公子新詩轉清絕柝聲四起心茫然
披衣起行各欲還
出門重與故人約莫教秋月空嬋娟

送虞山少宰從駕熱河

秋氣蕭蕭邊塞來草枯萬里鷹眼開
君王射獵順時令從臣應須文武材
我師早歲叅機密氣作祥雲心捧
日侍郎古稱執戟官吏部世推大手筆
詔書昨下明光宮姓名首列行圍中
牙旗錯落關山道羽衛飄飄聞
闔風
本朝幅帟邁前古熱河早闢
天王土百花匝
地錦成堆六月空山霜倒舞大軍畢
集車煌煌千山萬

山獵火光健兒擊獸如擊賊將軍挽弓爭挽強平沙列
幕風雲壯二十八宿羅貂帳大荒浩浩麒麟來飛毛洒
雪三千丈我師眉目秀若神色映塞外生清春筆光直
掩陸渾火博物能知貳負臣左射騶虞右射貍首再拜賡
歌祈萬壽天子親爲插彤弓旅矢千條鬯一卣長河
日落秋風起寶劍光寒射眸子北望燕山似斷雲茫茫
一氣清如水歸來輜重各紛紛掃盡櫓槍見碧氛起家
不愧輕車尉執法無嫌神策軍賜第平臺高列屋開筵
把酒看黃菊後堂絃管應許聞樂府新歌出塞曲

吳崑田金質夫表叔度夏日小集露臺得雨字

青陽裁辭春冰煒方孕暑竭來蓬萊仙共作鶯花主宵

雅既肄三象戲或格五子玉勿過萊茅容但炊黍兩兩
露臺登飄飄風裳舉簾影飛綠波酒面點紅雨密樹入
雲生飛禽出烟語佳期勿言歸月色淡如許

送劉斯和翰林改官山右

唐時開元輕外職班生內行如登仙未幾祐甫作員外
乞爲別駕心怡然朝臣俸薄難自給方鎮入相稱罷權
歙州刺史嫌降晚護軍初入心惛惛豈知官制無今古
或清或要難周全翰林百篇史不載循吏一事民能傳
河東天子股肱郡有詔置吏需名賢翰林劉君初入
覲命駕五馬驅蒲鞭君拜表辭臣母老請歌華黍歸
弄田爲我冷官壯顏色求者不得君真偏枳棘暫教棲

鸞鳳風霜正值飛鴈鷁此行強飯莫強酒從來割錦如
割鮮官趨官拜皆官耳尊卑于我無憎焉歐公勸人讀
文案儒者存心慎勉旃君從赤緊報課最鵬搏依舊升
雲天但笑宏農太守入都日莫教我輩傳觀一大錢

少年行

春花不紅不如草少年不美不如老誰家玉貌馬上郎
狹路相逢都道好金貂之冠紫綺裘起家身襲富平侯
與余握手銅龍樓衣香一過三年留阿兄侍中郎阿弟
都護府果然才調兼文武華堂隸事一百六郊外射虎
九十五公孫丞相殿上來得邀一語心顏開星河沉沉
夜漏緊貪看月明不肯寢強拉金吾開九門一杯酒寄

相思人吁嗟乎男兒結客女嫁夫只有江東孫伯符

代少年答

結客只結孫伯符買奴只買馮子都男兒作健貴年少
安用草元吃吃楊大夫承君贈我詩報君知己恩三千
疋絹裁百裨八百里駿供一殮猶覺寸心耿耿難具言
聞君歸娶婦送君西南走珍珠挂車頭珊瑚絡馬首忽
把金鞭指君口逢人但道李元忠海內英雄都置酒更
有書數行憑君傳四方四方有人願相見先取菱花自
照面

爲保井公題搖鞭圖

廣陵城中花十里龍樓鳳閣參天起婆羅爭舞蹈搖娘

琵琶唱斷安公子公子烟花最擅場起家三十侍中郎
羊侃爭人夸爪甲夏王車馬鬪重攔東方日出烏啼早
美人爭試絲桐好漏水能知夜短長海棠留得春多少
白馬紫游韁來遊大路旁初看小垂手再彈陌上桑聽
來天上回波樂誰是吳兒木石腸一聲鞭響垂楊處人
如蝴蝶花邊去不聞小海扣歌舷但見斜陽滿高樹豪
竹哀絲盡不歡請君少駐再盤桓誰知望斷樓頭婦西
北浮雲總不還

鼠噉戲作

二十九夜鼠噉於床氣矜之隆視人若亡予誓執之空
拳怒張銜枚用兵弗驚其走突如其來一鼠在手或曰

放焉相鼠有齒鋌而走險急則噬子子貪弗釋將扼其
尻果然拒捕齧指血漂陣傷而退鼠乃脫逃嗟子小子
拒諫自雄爲惡不卒爲善不終劫昏乘黑侮懦避凶適
可而止奚至拔窮戲爲歌詩以儆厥躬

宋徽宗玉璽歌

鄭殿揚得玉璽二一曰大觀珍瑑刻最深玉粹
白微滯疑蝕于火依今尺博一寸五分一曰秘
府珍玩刻稍淺沁如碎癥博一寸七分俱螭龍
紐按宋史大觀二年帝御大慶殿受八寶云云
然則二璽之爲徽宗無疑也不能得不能忘付

之一歌

鄭君古之符璽郎珍玩珍瑑家獨藏朱文深入半寸許
螭龍蟠紐牙鬚張通天犀割太華雪碧桃紅洒麻姑霜
千金難倣今刀鑿一見如逢古帝王憶昔道君全盛日
金裝玉軸紛拏撫銅篆親成博古圖法書聚作大觀帖
黃楊春滿絳霄宮花鳥餘閒召玉工牙脾親遞劉妃手
畫譜新翻良嶽風澄心堂紙真珠絹都在雙螭品定中
一朝兵掃汴城灰帝去冰天璽不隨紅羅袂罷三重盤
秋月寒生八寶輝可憐玉石無情物不念官家手澤垂
於今流落眼前過千金難買愁無那仙綠烟消寶篆存
燈檠土朽冬青大幾度摩挲意倍憐宣和遺事想當年
勝逢白髮深宮女同說紅羊小劫天

題金正希先生畫達摩圖

正希先生發清興雲藍剪紙如圓鏡畫作達摩面壁形
高坐枯龜呼不應泥金鈎髮垂尾拳側筆裁衣蟬翼勁
人疑道子以墨戲或道無功將佛佞以指喻馬隔兩塵
援儒入墨殊非稱誰知先生畫佛卽畫心直是誠通非
貌敬事惟詣極方參元思不出神難入聖當其爲文慘
淡時天外心歸功未竟顏淵專精能坐忘維摩憔悴常
示病絕無意想結空花那有風泉攪清聽眉毫禿盡腸
欲流三才萬象同參証較彼蒲團枯坐人禪理文心果
誰勝寫靜者相示衆人教用思功先練性碧山烟去月
才明秋水風停波自定文人學佛卽升天才子談禪多

上乘我爲增題墨數行勝補雲堂一聲磬

春寒

重裘逢二月袖手步芳林殘雪有餘色百花無競心踏
青苔影薄禁火客愁深傾耳碧溪畔黃鸝遲好音
漫訝楊花落誰知是雪飛窺欄蝴蝶靜出郭酒人稀寒
食名原稱東風力太微殘冬如未了難着五銖衣

嘉靖四年酒

世間老物無不有嘉靖四年一罌酒罌面泥封字數行
光祿中丞人某某器高三尺酒一尺逃盡酒魂存酒魄
想見當年議禮時爛醉釣天無醒客膩如膠漆丹如霞
香氣能開十里花酒人欲飲不敢飲未染一指先干嗟

我最畏飲勇忽賈僊僊願逐化人舞三杯吞盡兩朝春
心腹腎腸一齊古

新燕篇

涎涎燕年年二月來相見雙足能傳塞上書紅襟還帶
前年線前年人去漁陽道今日烏啼白門曉同是天涯
飄泊身滿屋落花泥不掃燕語何喃喃一雙訴盡梁曾
棲執戟明光殿曾伴邯鄲大道倡幾處空牀憐蕩子幾
番故國弓斜陽飛來飛去流年度惟有君家貧似故竹
聲時遇捲簾人山色自青春雨路燕兮燕兮休啄矢主
人與汝長居此莫嫌茅屋兩三間且學烏生八九子

西施

吳王亡國爲傾城越女如花受重名
妾自承恩人報怨
捧心常覺不分明

笙歌剛送采蓮舟
重捲珠簾倚畫樓
生就蛾眉顰更好
美人只合一生愁

文君

宵行事學君王后
識曲心同漢武皇
含淚自尋封禪草
遺書翻亂女兒箱

二喬

國亡家破名公女
同嫁英雄美少年
絕色易逢佳偶少
聽他夫婦自家憐

吳絳仙

家家竹葉引羊車一个仙娥管蠹魚可惜竟無書諫獵
六宮枉喚女相如

潘妃

玉釵生自劈楞伽尼子歸來步步花爭不荆條加苦手
教人好好作官家

張麗華

景陽門外一聲鐘喚起宮娥夢正濃底事軍中書告急
亂堆床下不開封

結綺樓邊花怨春青溪柵上月傷神可憐褒姒逢君子
都是周南傳裏人

孫夫人

刀光如雪洞房秋信有人間作媚愁燭影搖紅郎半醉
合歡床上海上夢荊州

玉環

五百袈裟回向寺一枝玉尺有前因緣何四海風塵目
錯怪楊家善女人
可惜雲容出地遲不將調語訴人知唐書新舊分明在
那有金錢洗祿兒

王才人

花明柳暗出宮門玉貌時時類至尊笑語百官休誤認
天容英武妾溫存
身逐寒雲落葉飛三千宮女淚沾衣山陵風雪黃昏雨

髣髴珠袍從獵歸

小周后

芳草萋萋故國秋江南烟雨十三樓夢中忘記家山破
猶與君王並輦遊

流珠一曲記何曾命婦班中恨不勝輸與娥皇先去好
柔儀殿上望昭陵

上官婉兒

論定詩人兩首詩簪花人作大宗師至今頭白衡文者
若个聰明似女兒

意有所得輒書數句

已來卽爲無未來或爲有欲知古人事便如昨日酒一

日復一日流光何匆匆幸而天下人光陰與我同
形爲萬卷累亦非達士懷不聞古神仙識字居蓬萊書
堆三萬卷轉使我意乖束之良可惜讀之不能該吾欲
法祖龍一舉爲灰埃終日仰屋梁不樂胡爲哉
燕王有名馬在廐四十載忽然騎不前敵國果先敗王
命圖馬形圖成而馬死馬意名已留可以沒吾齒嗚呼
士君子彼馬尚如此

落筆不經意動乃成蘇韓將文用韻耳揮霍非所難須
知此兩賢騷壇別樹旂白象或可駕朱絲未容彈耳竟
詩人詩刻苦鏤心肝

題錢璵沙網修峯青草堂圖

秘書遺裔訪湘靈
手帶離騷過洞庭
漢水澹含三楚白
君山分作幾船青
風謠到處書斑竹
烟景歸來上畫屏
此日草堂秋似雪
雲笏蕭瑟共誰聽